



KEMENTERIAN PERPADUAN NEGARA

## SIARAN MEDIA

### MAJLIS POLEMIK SEJARAH MALAYSIA SESI KE-53 “KAMPONG BHARU, KUALA LUMPUR: WARISAN SEJARAH ATAU TRANSFORMASI MASA DEPAN?”

---

**KUALA LUMPUR**, 17 Februari 2025 – Satu **Majlis Polemik Sejarah Malaysia Sesi Ke-53 “Kampung Bharu, Kuala Lumpur: Warisan Sejarah Atau Transformasi Masa Depan?”** telah diadakan sebagai usaha untuk merungkai fakta sejarah yang masih menjadi polemik dalam masyarakat dan negara. Majlis perasmian telah disempurnakan oleh YBhg. Datuk Seri Hj. Hasnol Zam Zam bin Hj. Ahmad, Ketua Setiausaha Kementerian Perpaduan Negara, di Dewan Bandaraya Kuala Lumpur (DBKL), hari ini.

Program ini dilaksanakan oleh Kementerian Perpaduan Negara melalui Arkib Negara Malaysia, Perpustakaan Kuala Lumpur dan DBKL. Penganjuran siri Majlis Polemik Sejarah Malaysia ini sejajar dengan matlamat Kementerian Perpaduan Negara (KPN) dalam memperkasa sejarah, warisan dan budaya di bawah agenda perpaduan nasional dengan matlamat menyebarkan pengetahuan, kefahaman dan penghayatan berhubung Perlembagaan Persekutuan dan Rukun Negara.

Tema **“Kampung Bharu, Kuala Lumpur: Warisan Sejarah atau Transformasi Masa Depan?”** dipilih untuk mengupas isu dan cabaran sistem keseimbangan antara pemeliharaan warisan sejarah dan kemajuan Kampung Bharu, Kuala Lumpur yang menjadi simbol sejarah **“hidup”** di tengah-tengah kemodenan Bandaraya Kuala Lumpur. Kampung Bharu menjadi **penempatan masyarakat Melayu** bersejarah dan strategik sejak ditubuhkan pada tahun 1900 yang masih kekal mempertahankan **identiti dan tradisi Melayu** dalam bentuk **seni bina** rumah tradisional, **cara hidup**, serta **aktiviti harian komuniti Melayu**.

Sebagai penyimpan khazanah warisan negara, Arkib Negara Malaysia mengambil pendekatan *total archives* dalam memperoleh rekod dan sumber persendirian sama ada dari dalam mahupun luar negara sebagai strategi dan pendekatan untuk mengumpul rekod-rekod. Sehingga kini, terdapat 2,500 rekod

terdiri daripada rekod-rekod berbentuk fail, manuskrip, kartografi, pandang dengar, terbitan, surat khabar, majalah, kertas kerja dan personalia berkaitan Kampong Bharu, Kuala Lumpur terdapat di Arkib Negara Malaysia.

Usaha yang dilaksanakan oleh Arkib Negara Malaysia dengan menganjurkan siri Majlis Polemik Sejarah Malaysia adalah seiring dengan aspirasi **Kerajaan MADANI** yang menekankan nilai ketelusan, integriti, dan keterangkuman. Setiap perbincangan Sejarah hendaklah berlandaskan fakta yang sahih serta nilai-nilai ilmu yang tinggi. Program sebegini banyak memberi manfaat dan sumbangan kepada pengkaji sejarah mahupun pemegang taruh (*stake-holder*) kepada isu-isu yang berkait rapat dengan sejarah. Program ini diharapkan agar dapat memberi pencerahan serta percambahan idea dari aspek naratif dan kesimpulan sejarah dalam menyelesaikan sesuatu isu yang timbul.

**KEMENTERIAN PERPADUAN NEGARA**  
**17 Februari 2025**